

V Brüderlich lieb / ist blind vnd dott
Vff btrogenheyt eyn yeder gat
So mit er nutz hab / on verlust
Ob hundert joch verderben sust
Keyn erberkeyt sicht man me an
Man loßt es über die selen gan
Echt man eyns dings mög kumen ab
Got geb ob tusent sturben drab /
Vor vß / loßt man den wyn nüm blißen
Groß falscheyt düt man mit jm trißen
Salpeter / schwebel / dottenbeyn
Weydesch / senff / milch / vil krut vnreyn /
Stost man zum puncten in das faß
Die schwangern frowen drincken das
Das sie vor zyt genesen dick
Vnd sehen eyn ellend anblick /
Vil krankheyt springen ouch dar vß
Das mancher fert ins gernerhuß /
Man düt eyn lam roß yetz beschlagen
Das wol ghört vff den spittel wagen
Das muß leren vff fyltzen stan
Als solt es nachts zu metten gan
So es von armüt hincket vnd zelt
Muß es doch geltten yetz sin gelt
So mit beschissen werd die welt
Man hat kleyne moffen / vnd gewicht
Die elen sint kurz zu gerycht
Der koufflad muß ganz vinsten syn
Das man nit seh des tüches schyn
Die wile eyner düt sehen an

